

Communicaziun allas medias digl cumegn da Surses (02-2016)

Pi pacs firos e taimps d'avertura da buteias liberals

Aint igl cumegn da Surses na dattigl nignas restricziuns pertutgont la sarada da buteias ed igls taimps d'avertura da buteias. Pinavant è nia redutgia igl domber da firos. La radunanza communalà è approvo glindesde seira cun gronda maioritad la lescha davart igls deis da pôss publics, tgi regla er l'avertura dallas buteias. Igl suveran è er approvo la lescha d'ustareia e la lescha da natiralisaziun.

La lescha davart igls deis da pôss publics è neida elaborada sen fundamaint dalla lescha correspondentia digl anteriour cumegn da Savognin. Cugl scopo dalla promoziun dall'economia è la suprastanza introduia sapientivamaintg ena soluziun liberala per buteias. Chellas pon a partair da dalunga restar davertas durant igls deis da pôss publics e durant igls firos gronds. Er igls taimps d'avertura dallas buteias n'èn sottamess a nigra restricziun. Resalvadas restan las prescripziuns legalas digl dretg surordino, scu p.ex. la lescha da labour. Stritgia ins è er igls firos «Sontgiglcrest» e «Son Gisep». Chels dus firos valan a partair dad ossa scu deis da labour ordinaris aint igl cumegn da Surses. La lescha aintra an vigour cun l'approvaziun.

Lescha d'ustareia e lescha da natiralisaziun

La radunanza communalà è approvo sainza discussiun e cun fitg gronda maioritad tant la lescha da natiralisaziun scu er la lescha d'ustareia. Tottas dus leschas aintran an vigour cun l'approvaziun.

Igl affar pertutgont la vendita d'ena tga d'ena famiglia a Salouf vign ranviia

Igls votants e las votantas digl cumegn on decidia da betg antrar segl affar pertutgont la vendita d'ena tga ainten la zona d'indigens « Davos-Clavo » a Salouf. Igls proprietaris da chella immobiglia on dumando agl cumegn igl dretg da pudeir vender la tga er a persungas tgi na stattan betg a Salouf. Sen proposta or dalla radunanza è la suprastanza ossa da surluvrar chel affar cun harmonisar gl'amprem igls reglamaints digls divers cumegns uriunds pertutgont la vendita da parcellas resp. la cunsigna da talas an dretg da biagier.

Ulteriours sclarimaints dat igl mastral Leo Thomann (telefonign 079 405 96 73).

Tinizong, 23 da matg 2016